

LI GRANDIVEÛ P'TIT BÈDOT

One bèle blanke bèrbis èt on bèrau qu'aveut fwârt bèle alûre vikin.n' bin paujêremint al cinse do vî Batisse. One pitite cinse di bleuwès pîres, véla au coron dèl reuwe do Vèvî. Dispû saquants-anéyes, il aurin.n' bin v'lu awè on p'tit maïs, c'èst po lès bièsses come po lès djins, ça n' va nin todi do prumî côp ... ça fait qu'Agnèle, li bèrbis, èsteut tote disbautchîye. Artaban, li bèrau, li, i n'èsteut nin trop fiér non pus, si d'djant qu' ç' èsteut quétefîye di s' difaute. Èt Batisse què pinseut-i? Li qu'aveut todi stî come on père por zèls èt tofêr lès milouter. Anoyeûse qu'èle èsteut l' cope. Anoyeûse au d'la.

"N'î sondjans pus d' trop" a-t-i dit on djoû Artaban à s' bèle Agnèle èt zoubler tot-autoû d' lèye po lî fé r'tover s' sorîre.

Adon i 'nn'ont pus causé ... jusqu'à ç' nét là, dèl florîye Pauque, qu'Agnèle lî a fait on bia p'tit crolé bèdot, bia come li p'tit Jésus. Artaban n' si sinteut pus. Il a stî suker, suker èt suker su l'uch dèl tchambe da Batisse. Li vî ome s'a dispièrté èt s' dîre: "Mâria Dèyî, gn-a l' tête qui s' cocheût!". Èt c'è-st-adon qu'il a vèyu s' bèrau moussî è s' tchambe come on-èfoufyî.

"Vinoz rademint, Batisse, Agnèle nos ratind".

Quand l' vî Batisse a vèyu li p'tit bèdot, il a r'froté sès-ouys. Qué bia tauvia!
I r'pinseut sins manque à s' chère Jènîye qu'aveut moru tote djon.ne adon qu'èle ratindeut leû prumî-y-èfant.

Li p'tit bèdot crècheut come on-aubwisson. On p'tit arnauje qui n'aveut nin pus d' choûte qu'on bokèt d' bwès. Moman bèrbis èt popa bèrau èstin.n' naujis come deûs vîs bribeûs maïs i s' mètîn.n' dins l'idéye qu'on djoû ça îreut mia.

Zîré - c'èst-insi qu' l'avin.n' lomé leû p'tit - quand il aveut one saqwè è l' tièsse, i n' l'aveut nin ôte paut. I v'leut tofêr fé mia qui l's-ôtes, i v'leut tofêr awè raïson, i v'leut tofêr yèsse maïsse. Èt ça n' candjeut nin. Qui do contraire! Au d'pus èst ç' qu'î crècheut, au d'pus èst ç' qu'îl èsteut mau-riv'nant.

Sès parints n'èstin.n' nin po s' vanter, zèls, maïs li, i vèyeut fwârt grand. I s' fieut valu. I pinseut qu' c'èsteut li qu'aveut pichî Moûse! Èt i fieut tot èt cor avou po qu'on l' veûy voltî, seûlemint, po ça, il aureut d'vu r'tôurner s' frac ca tos lès bèdots do cwin l' vèyin.n' èvi.

"I n' si faut nin prinde po l' botroule do monde" lî aveut-i dit, on djoû, onk dès bèdots dal cinse da Marîye Tchitchi, li cinse qui djondeut l' cène dau vî Batisse. Pont d' soçons, i 'nn'aveut pont!

Ça fait qu'on djudi di l'après-non.ne, Agnèle èt Artaban ont décidé dè l' mwinrner èmon l' vîye troupière què lî a fait l' lèçon, lèye. "Vos-èstoz on grandiveû, Zîré" lî a-t-èle dit. "Ci n'èst nin bia, èt dji m' vos va dîre one saqwè qui v's-î faurè r'ssondjî tos lès djoûs d' vosse vikérîye: dins tot ç' qu'on-ètèrprind, là, i faut todi c'mincî au pîd dèl

chaule, nin al copète, mi fi! C'èst pate à pate qui vos faut avancî si vos n' v'loz nin awè on djoû one broke".

Quand nosse Zîré a rintré, il èsteut ossi pèneûs qu'on r'naud qu'aureut yeû stî pris pa 'ne pouye. Èt tûzer èt ratûzer. Èt s' dimander comint fé po candjî. Pwis tot d'on côp, il a ètindu one pitite vwès padrî on bouchon. C'èsteut l' cène da Mandine, li bèdéye do Tchèstia do Vèvi què lî sofleut: "Èt si nos sayerin.n' nos-ôtes deûs d' vos fé candjî, Zîré?"

Zîré a trèssiné èt, tot d'on côp, i s'a sintu div'nu bèrau. Il èsteut fin près' à candjî, à fé l' vôle avou lèye, èt à d'ner one driglèye di sâdjes pitits-agnas à s' moman Agnèle èt à s' popa Artaban.

A.-M. FRANCOIS